



UKA 2016/007-01

21-09-2016

2017-mut aningaasanut inatsisissatut siunnersuut.

Aallaqqasiullugu Partii Naleqqamiit oqaatigissuarput Partiinik tamanik Naalakkersuisunillu suleqatiginnilluarnissaq pingaartikkatsigu, nunatta pitsasumik sutigut tamatigut ineriartilluarneqarnissaa anguniarlugu.

Soorlu ammaanersiornermi naggaliullugu imannak oqaaseqaateqartugut:

“Suliassat annertoqaat inuttut ajornartorsiuterpassuarnik peqarpugut aaqqinniagassatsinnik, isummat assigiinngissinnaasut aporfigiunnaarlugit suleqatigiissutissagut ujartigit. Uagullu peqataarusuprugut aamma sinniuteqarluta akisussaaqataanissatsinnut. Isummat ilaat aporfigiinnarnagit suleqatigiissutissagut ujarusuppagut, inuiaqatigiinni killiffik pitsaanerulissapat aporfiiit pitarlugit suleqatigiittariaqaleratta ataatsimut alloriartoqarnissaanut peqataarusukkatta”.

Taama oqareerluta aamma erseqqissaatigissuarput, Partiitut anguniakkatta pingaartut ilagimmassuk, inuit ilaqtariillu pissakinnerit, meeqqat atungarliortut, utoqqaat siusinaartumillu sulisinnaajunnaarnersiutillit, napparsimasut allallu inuiaqatigiinni ikiortariaqartut sapingnisamik pitsaanerpaamik inuuniarnikkut oqilisaannissaat suleqataffigissallugu.

Taamaammat Naalakkersuisut Partiillu tamaasa kaammattorusuppavut, inuit qulaani taajukkatta ulluinnarni inuuniarnikkut oqilisaannissaat aningaasanut inatsisikkut pitsaanerusunik inuuneqarnissaannut aqquqsiuuteqqullugu.

Taamaaliornissatsinnut periarfissat arlaqarput, tamakkulu ilagaat; nunatta karsiata akileraarutitigut isertittangaasa amerliartornissaannut periarfissat pitsaanerulersinnissaasa sulissutigiuarnissaat.

Assersuutigalugu, ukiuni makkunani saarullippassuit nalliusimaarnerini aningaasarsiornikkut suliffissaqarnikkullu tamakkiinerusumik atorluarneqannginnerat allanngortinneqartariaqarpoq.

Aamma nunatta kangiani aalisarnikkut siuarsaaneq annerusoq aallunneqartariaqarpoq, tassami naluneqanngilaq, saarullippassuit aamma tunup sineriaanut takkussimapput aamma Sermilingaap eqqaani qaleraleqarfeqarpoq, qilarnangitsumik ullumikkorniit suliffissaqartitsiniarnermut aningaasarsiornerusinnaanermullu atorluarneqarnerusinnaangaluartumik.

Aammami Naalakkersuisut naalakkersuisooqatigiinnissamik isumaqatigiissutaanni ilaareeraluarpoq:

“Tunumi Tasiilap eqqaani Ittoqqortoormiunilu aalisarnermik inuussutissarsiuteqarneq immikkut pilersaarsiugaasumik siuarsarneqassaaq, aalisariuteqarnikkut tunitsiveqarnikkullu ineriartortsiviusumik”.

Avaleraasartoorniarnermi pisassanik agguassisarneq nunatsinnut iluaqsiisinjaaneq anguniarlugu nunaqavissut salliutinnejartariaqartut piumasaraarput aamma pisassanik agguasarneq kingusinaartinnagu ingerlannejartariaqartoq kaammattuutingaarput.

Aningaasanik amerlanerpaanik nunatta karsianut isaatitsissangutta inoqarfintti assigiinngitsuni tunisassiorfeqarnikkut pitsangorsaasariaqarpugut, ilumoorsinnaanngilarmi aalisartut ilaasa taamaallaat sapaatip akunnerata ingerlanerani ulluni aaliangersimasunik killilerujussuarmik tunisisinjaatitaasarnerat.

Piniartuunerup ataqqineqarluni inuussutissarsiutitut ingerlaannarnissaa qulakkeersimaniartuartariaqarpoq. Taamaattumik piniakkanik pisassiisarnerit assigiinngitsut eqqarsaatigalugit nalilersuilluaqqittooqartariaqartoq isumaqarpugut.

Tassami assersuutigalugu, qilalukkanik qaortanik pisassiisarneq, piniartut ilisimasaannut nalunaarutigisartagaannut naapertuitinngilluinarmat. Taamaammat neriuutingaarput Naalakkersuisut piniakkanik pisassiisarneq eqqarsaatigalugu piniartut isumaannik tusaaniarnerusariaqartut.

Aammami naalakkersuisooqatigiinnissamik isumaqatigiissummi imannak allaqqasoqareermat:

“Qilaluarniartarnermi inatsisitigut maleruagassat naleqqussarneqassapput, piniartut aningaasarsiornermikkut iluaquserneqarsinnaanerat pingaartillugu”.

Naluneqanngilaq kommunerujussuit aaqqissuuteqqinnejarnissaat eqqartorneqartillugu suliassanik akisussaaffinnillu kommuninut nuussuinissaq soqtigineqarluni eqqartorneqartoq.

Taamaattumik aningaasanut inatsisissatut siunnersummi ilaatigut suliassaqarfinnik, soorlu assersuutigalugu sanaartugassanut tunngasut, aalisarnermut piniarnermullu allagartat kommuninit

tiguneqarnissaat eqqartorneqarmata, Partii Naleqqamiit soqutiginnilluta oqaloqataanissatsinnut piareersimanerput matumuuna nalunaarutingaarpot.

Qaasuitsup kommuniata avinneqarnissaa 2013-imili taavani innuttaasut taasitinneqarnermikkut kissaataat naammassillugu kommuninut tulliani qinersisoqartinnagu naammassineqartariaqartoq piumasaraarput aamma piumasaraarput Qaasuitsup kommuniata avinneqarnissaa nunatta karsiata akileeqataaffigisariaqaraa.

Sulineq aaqqissuunneqartariaqarpoq, ikorsiissutinit tigusartagaqarnermiit imminut akilersinnaanerusunngorlugu, taamaaliornermilu SIK aamma soqutigisaqaqtigiillu allat peqataatinneqartariaqarput.

Ataqqeitatigiinnerup suleqatigiilliuarzinnaanerullu aaqqani, suliat pisinnaasallu assigiiit assigiimmik akissarsiaqartinneqartariaqarput, soorlu tamanna SIK-p ukiorpassuarni piumasaqaatigiuarsimangaa.

Taamaattumik akissarsiatigut assigiinngisitsinerup atorunnaarsinneqartariaqartoq pimoorullugu anguniartariaqartoq isumaqarpugut.

Tassami ajoraluartumik maannamut ilisimaneqarpoq, aamma taakku naatsorsueqqissaartarfiup kisitsisaataani takuneqarsinnaapput, tassa sumiiffit ilaanni tikisitat nunaqvissuniit allaat marloriaat sinnerlugu akissarsiaqartinneqartarmata, tassa taamaammat suliffeqarfinni assigiinngitsunik tikisitaaneq nunaqvissuuunersorlu apeqqutaillugit akissarsiaqartitaanikkut assigiinngisitsisarneq tamaanga killeqartariaqartoq piumasaraarput.

Taamaammat tikisitat tikisitaanngitsullu akissarsiaasa assigiinngisinneqartarnerannut tunngatillugu aningaasanut inatsimmi danskit naalagaaffiata ataatsimoortumik tapiissutaanut tunngatillugu oqaaseqatigiit uku:

“Kalaallit Nunaannut akit akissarsiallu iluarsiiffigineqarnerat naalagaaffiup assinganik iluarsiineranut akigitinneqartunit annerusimappat naalagaaffiup Kalaallit Nunaannut ataatsimoortumik tapiissutaasa nalinganik naleerunnerulersitsisussaavoq”

Oqaaseqatigiit taakku akissarsiat assigiinngissutaannut tunngatillugu ersarissumik qanorpiaq nassuiatissaqarnersut paaserusuppagut.

Tassami naligiisitaaneq naalakkersuinikkut pingaartinneqaqaaq aamma naligiisitaanermut siunnersuisooqatigiinnik peqarpugut, taamaammat tikisitat tikisitaanngitsullu akissarsiaqartitaanikkut allatigullu ajunngitsorsiassaqartinneqarnerisa assigiinngisinneqarnerat taamaatinneqartariaqarpoq.

Inunniq kinaassusersiuneq assigiinngisitsinerlu aamma suleqatigiilluarnerusinnaanermut iluaquataanngilluinnartoq, suliffiullu iluani pissutsinut pitsanngorsaataasinnaanngitsoq tamatta takorloorsinnaavarput.

Tassami Partii Naleqqamiit pingaartipparput, suliffeqarfinni sungaluartuniluunniit nalingiisitaaneq ataqqeqatigiinnik suleqatigiilluarnerlu anguniarneqartuartariaqartut.

Suliffissanik ataavartunik pilersitsinerunissaq eqqartorneqartuertoq pimoorunnerusariaqarparput. Soorlu assersuutigalugu, imermik nilannillu tunisassiornerunissaq, erngullu nukingata nukissiuutitut avammut tunisassiarineqarnissaa aamma pimoorunnerusariaqarpagut.

Aatsitassarsiornermi, ujaqqanik pinnersaasiassanik, ujaqqanillu erlinnartunik nunaqavissut namminerisaminnik tunisassiorsinnaanermut pitsaanerusunik periarfissarsiuunneqarnissaat pisariaqarluinnarpoq.

Takusinnaavarpummi aamma qangaaniilli ilisimaneqarpoq, Qeqertarsuatsiaat eqqaani “aappaluttumi” rubin-inik piaaneq tunisassiorissarlu nunanit allaniit assorujussuaq soqutigineqartoq.

Tamatumammi upternarsisippaa, suliffeqarfiup maanamut “aappaluttumi” ingerlatsisimangaluartup akiliisinnaajunnaarluni nalunaaruteqarneraniit piffissap siviktsoralaannguup ingerlanerinnaani, ingerlatamik tigusiniarluni nalunaartoqapallareernera.

Soorunami, kialluunniit takusinnaasariaqarpa, “aappaluttumi” pisuussutivut uumaatsut ingerlakkusukkaanni qanoq imminut akilersinnaatigissasut.

Maannamulluunniimmik ilisimaneqanngilaq, “aappaluttumiit” rubinit ukiorpassuarni piiarneqarlutik annissuunneqartut qanoq naleqarnersut ? aammalu taakkua nunatsinnut qanoq iluaquatasinnaassusii.

Taamaattumik Naalakkersuisunut piumasareqqissuarput, ujarassiornermit, ujaqqanillu pinnersaasiassanik katersinermi atuinissanilu, nunaqavissut – ujaqqanik pineqartunik atorluaarusuttut tunisassiorutullu ingerlariaqqinnissaanut pitsaasunik aqqutissiuunneqartariaqartut.

Aamma isumaqarpugut maani nunaqavissut suliffeqarfiiit suliassaqtittuarnissaat, pisortat suliassaataannik suliariumannittussarsiuussisarnermi inatsisikkut suliassanik neqeroorsinnaanermut periarfissinneqartariaqartut.

Taamaammat Naalakkersuisut naalakkersuisooqatigiinnissamut isumaqatigiissutiminni imannak isumaqatigiissuteqarmata isumaqatigilluinnarpavut:

“Sanaartornerup nakkutigineqarnera sukaterneqassaaq.

Sanaartugassanik suliariumannittussarsiuussisarneq pillugu inatsisit attuumassuteqartut tamarmik nutarteriffingineqassapput, taamaaliornikkut suliffeqarfiiit minnerusut sanaartornermi peqataalluaqqilernissaat anguneqarsinnaaqquillugu”

Taamaammat Partii Naleqqamiit assorujussuaq soqutingaarpot paassisallugu, qulaani isumaqatigiissutigisimasassi piviusunngortinneqarnissaa qaugu naatsorsuutigisinnaanerippot maannakkut paasissutissiissutigisinnaangussiuk.

Tassami suliffeqarfiiit kalaallinik pigineqartut, maanilu ilinniartuuteqartut, inuaqatigiinnilu siuariartornissamut qanumut soqutingisaqrutik suleqataalluartut, kisiannili ajoraluartumik pisortat suliassaataannik ilaatigut pissarsinngitsoortartut amerlanertigullu sumininnguanik suliakkerneqartarerat akuersaarneqarsinnaanngilluinnarmat.

Isumaqpugut inuaqatigiinni aningaasat taama amerlatigitsut amingaatigineqartillugit inatsisartut imminnut siulliutillutik Allaffeqarfissarsuarmik pisaarnissaannik sinnatuaqineq akuersaarneqarsinnaanngitsoq, tassami meerarpassuit atungarliuuteqarput, suliffissaaleqineq qaffaseqaaq, utoqqaat siusinaartumillu sulisinnaajunnaarnersiillit ilaat tigusartagannguaminnik ilanngartuiffigineqanngikkunik piiaffigineqarput il.il.

Taamaammat inatsisartut allaffeqarfittaassaanut pilersaarut akuersaanngilarput.

Ingerlatsinermi sipaarniarnerit naalakkersuisuniit siunnersuutigineqartut ilalerpagut, tassami aningaasarpassuit inuuusuttut suliffissaqanngitsut, ilinniaqqinnissaminnullu ingerlariaqqinnissaannik periarfissiissutaasussat allarpasuillu pisariaqartitsisut akissaqartinneqartariaqarput.

Mittarfiliortiternerit Nuummilu umiarsualiviliorneq isumatuumik aningaasartuutikillisaanissaq siunertaralugu immikkut ingerlatseqatigiiffiliuunneqarsinnaaneri assut eqqarsarnartoqartipparput, tassami assersuutigalugu umiarsualiveqarnermut tunngasut Royal Arctic Line-ip ukiorpassuarni ajunngitsumik ingerlatarai.

Taamaattumik Nuummi umiarsualivissap “Sikuki Harbour” aningaasartuutikillisaaneq anguniarlugu Royal Arctic Line-ip ataani ingerlanneqarnissaa inassutingaarpot, tassami akissaqarnatalu nukiissaqanngilagut ingerlatseqatigiiffiit pioreersut saneqqutiinnarlugit ingerlatseqatigiiffinnik allanik pilersitsisaqattaassalluta, tamaasa immikkut direktør-ilersorlugit siulersuisulorsorlugillu.

Isumaqpugut mittarfiliortiternissat eqqarsaatigalugit Namminersorlutik Oqartussanit pigineqareersut ingerlatseqatigiiffiit arlaata ataani inissinneqarsinnaasoq, immikkut siulersuisunut direktør-inullu aningaasartuuteqanngikkaluarluni.

Aamma Polar Oil-p siunissaa eqqarsaatigalugu ataatsimoortitsilluni ingerlatsinissaq aningaasartuutikillisaanissaq anguniarlugu eqqarsaatigilluarneqarlutillu nalilorsorluarneqartariaqartut.

Ingerlatseqatigiiffinnut akileraarutip 18-20 %-mut apparitinneqarnissaanik Naalakkersuisut siunnersuutaat oqaloqataaffigerusupparput, tassani aamma soorunami soqtiginarmat, taamatut aaqqissuussinissaq kommuninut landskarsimullu aningaasatigut qanoq sunniuteqassanersoq paasilluassallugu soqtiginarmat.

Avatangiisnik illersuinerunissaq eqqarsaatigalugu snescooterit ATV-inillu taaneqartartut akitsuuserneqarnissaat oqaloqataaffigerusuppagut, tassani aamma angallatit taakku aqqusineqanngitsuni nunaqarfinni iluaqtaasumik atugaasarnerat arlalitsigullu eqqartorluarneqartariaqarmat.

Apeqquataalluinnarunarpoq angallatit eqqartorneqartut nuannariinnarlugu atugaanerat imaluunniit inuiaqatigiinni kiffartuussinermut atugaanerat.

Radio-kut ullaakkut qinoqatigiittarnerit qanittukkut tusagassiuutitigut tusarparput aallakaatinneqartarunnaartut, tamanna assut uggornarpoq. KNR-ip ingerlanneqarneranut 70 mio- ingajannik inuiaqatigiit ukiumut tapiissuteqartarpuit, tammaattumik pissusissamisoorpoq ullaakkut oqaatsinik iluartunik tusartarnissamik piumasaqassalluta.

Taamaammat upperisarsiormut tunngasut , minnerunngitsumillu sumiiffiit ilaanni ajoqinik, oqaluffimmilu pattattunik amingaateqartarnerit qaangerniarlugit immikkorluinnaq iliuuseqartariaqartugut.

Ilumullimi naalakkersuisooqatigiit isumaqatigiissutaat malillugu anguniagaqartoqaraluarpat aamma ilageeqarnerup tungaa eqqarsaatigalugu, qanoq ilagiinnut ilagiinnilu sullisisunut oqiliallaataatigissangaluarpa, tassami naalakkersuisooqatigiit isumaqatigiissutaat imaattoq:

“Naalakkersuisooqatigiit anguniarpaat Kalaaleq timikkut tarnikkullu peqqisoq. Upperisaq innuttaasut nukittoqutigisarmassuk anersaakkut inuunerup nukitorsartuarnissaa pisariaqartinneqarpoq. Taamaammat Nunatsinni pisortatigoortumik oqaluffeqarnermi Ilagiit Kalaallit Lutherikkuusut tunngaviupput”.

Oqaaseqatigiit taakku Partii Naleqqamiit aamma isumaqatigilluinnarpagut, suleqataaffigerusullugillu.

Piffissaq annikimmat naggataatigut oqaatigissuarput, naalakkersuisut inuusuttunik sulilersitsiniaanermut ilinniartitseqqinnissamullu tunngasut, meeqqanik isumaginninnermut tunngasut, efterskolertitsisarnerup annertusarneqarnissaanut aammalu pissakinnerit akunnattumillu aningaasassialinnik meerartalinnut akiliisitsisarnerup atorunnaarsinneqarnissaanut tunngasut suliniutit tamaasa tapersorsoratsigit, taakkummatami aamma anguniakkatsinnut naapertuulluinnartut.

Naggaterpiaatigut timersornikkut kulturikkullu suliniutit ajunngitsut aamma tapersorsorpavut, kaammattuutigalugulu Ilulissani arsaattarfittaassamut qulisamut pilersaarutit qanimat malinnaaffigeqqullugit, tassami paasitinneqarnerput naapertorlugu suliniummut tassunga suleqatigiit maannamut 40 mio kr-it pallillugit katersoreersimalermatigik, sulialluggooq piviusunngortinneqarnissaanut Namminersorlutik Oqartussat 10 mio kr-inik aningaasaleeqataanissaat kisiat amingaatigineqarmat.

Taamaammat Naalakkersuisut maatumuuna kaammattorpavut Ilulissani arsaattarfiliorniarlutik suleqatigiit qanimat suleqatisereqqullugit.

Taama oqaaseqarluta isumatigiiniaqqinnissamut oqaloqataaqqinnissamullu piareersimanerput nalunaarutingaarput.